

Siunnersuut uunga: Inatsisartut Suleriaasiata allanngortinneqarnera
(Inatsisartut Siulittaasoqarfiat)

§ 1

Inatsisartut Suleriaasianni 12. november 2010-meersumi, 22. september 2011 aamma 29. maj 2012-imeersunik allannguutitalimmi, makku allannguutigittinneqassapput:

1. § 1, imm. 2, ima oqaasertaqassaaq:

”Imm. 2. Imm. 1 naapertorlugu ilaasortaq Inatsisartunut sivisunerpaamik ilaasortaasimasooq Inatsisartut sinnerlugit Inatsisartunullu ilaasortat akornannit Qinigaanerup Misilinneqarnissaanut Ataatsimiititaliaagallartumik pilersitsissaaq. Ataatsimiititaliap ilaasortarissavai sivisunerpaamik ilaasortaasimasooq siulittaasutut, ilaasortallu allat sisamat sivisunerpaamik ilaasortaasimasumit, Inatsisartuni naalakkersuinikkut suliniaqatigiiffinnit sapinngisamik tamatigoornerpaamik sinniisuutitaqarnissap qularnaarneqarnissaa siunertaralugu toqqarneqartunit.”

2. § 4-mi imm. 8-p kingornanut immikkoortut nutaatut ilanngunneqassaaq:

”Imm. 9. Imm. 2 naapertorlugu Suleriaatsimut Ataatsimiititaliap suliassaraa §§it 32 aamma 60 naapertorlugit Siulittaasoqarfiup siunnersuutai sularisassallugit. Suleriaatsimut Ataatsimiititaliaq ataatsimiititaliat suliassaarfii pillugit aalajangiisarpooq, tamanna nalorngissutigineqalersillugu. Ataatsimiititaliaq taamatutaaq § 56 malillugu Inatsisartunut ilaasortat paasissutissiisussaaitaanerat pillugu malittarisassanik aalajangersaasarpoq.”

3. § 9, imm. 1-imi oqaaseqatigiit aappaat atorunnaarpoq.

4. § 10, imm. 2-mi oqaaseqatigiit aappaattut nutaatut ilanngunneqassaaq:

”Siulittaasoqarfiup Inatsisartut Allattoqarfiat piginnaatissinnaavaa pisuni ataasiakkaani ataatsimiititaliat sulineranni inuttut sinniisussaqaarnissamik partiit qinersisarnerilluunnit pillugit suleqatigiit qinnuteqaataasa akuerinissaannik aalajangiisinnaatillugu.”

5. § 14-imi imm. 2-p kingornanut immikkoortut nutaatut ilanngunneqassaaq:

”Imm. 3. Ataatsimiititaliaq apeqqutip allakkatigut akineqarnissaanik qinnuteqarpat, ataatsimiititaliap qinnuteqaataa Naalakkersuisunit naammassineqassaaq. Naalakkersuisut taamaallaat paasissutissanik ataatsimiititaliap pissarsisinnaanera killilersinnaavaat, ataatsimiititaliap taakkuninnga paasisaqarnissaminik soqutiginninnera pisortat namminersortulluunniit soqutigisaannut sakkortuneroqisunut tunullinneqartariaqarpat. Taamatut killiliineq tamatigut allakkatigut tunngavilersorneqarsimassaaq.”

6. § 17, imm. 1-imi oqaaseqatigiit aappaat atorunnaarpoq.

7. § 19 ima oqaasertaqassaaq:

”§ 19. Ataatsimiititaliaq qanoq ilisukkulluunniit Naalakkersuisunut ilaasortamik siunersiuinissamut ilisimatitsiffiusumilluunniit ataatsimiinnissamut aggersaasinnaavoq. Naalakkersuisunut ilaasortaq atorfilimmik ataatsimik tamatigut ingjallorteqarsinnaavoq. Naalakkersuisunulli ilaasortap atorfilinnik arlalinnik ingjallorteqarnissaa ataatsimiititaliap akuersissutigisinnaavaa. Tamanna ataatsimiititaliamut qinnuteqaatigineqartassaaq ataatsimiinnissaaq sioqqullugu.

Imm. 2. Ataatsimiititaliap naliliinera naapertorlugu Naalakkersuisunut ilaasortaq pissutissaqavilluni peqataasinnaangippat immikkorluinnaq ittumik pissutissaqartoqartillugu siunersiuneq ilisimatitsiffiusumilluunniit ataatsimiinneq atorfilik ataaseq arlallilluunniit peqataatillugit ingerlanniarneqarsinnaavoq.

Imm. 3. Siunersiunerimi ilisimatitsiffiusumilluunniit ataatsimiinnermi atorfilittami oqaaserisaanut Naalakkersuisunut ilaasortaq akisussaasuvoq.

Imm. 4. Siunersiunerimut ilisimatitsiffiusumilluunniit ataatsimiinnermut matoqqasumut tamanulluunniit ammasumut aggersaasoqarsinnaavoq. Tamanut ammasumik siunersiunerimut ilisimatitsiffiusumilluunniit ataatsimiinnermut aggersaasoqarpat isumasioqatigiinnermi kikkulluunniit najuussinnaapput. Siunersiunerit ilisimatitsiffiusumillu ataatsimiinnerit tamanut ammasumik ingerlanneqartut immiussissutinut immiussissutinulluunniit assigisaannut immiunneqassaaq.”

8. § 36, *imm. 1* ima oqaasertaqassaaq:

”§ 36. Inatsisartunut ilaasortap pisortat suliassaataat Inatsisartuni oqaluuseritinniaruniuk kiisalu Naalakkersuisunut ilaasortap tamanna pillugu nassuiaateqarnissaa Naalakkersuisunulluunniit ilaasortat arlallit nassuiaateqarnissaat piumasariguniuk, tamanna pisassaaq apeqquteqaatikkut Inatsisartut oqaaseqaatissaannut siunnersuummik ilaqartinneqartumik. Apeqquteqaat erseqqissumik allaganngorlugu tunniunneqassaaq Inatsisartullu Siulittaasuannut, apeqquteqaat agguanneqareerpat apeqquteqaammik Inatsisartunut nalunaaruteqartussamut, tunniunneqassalluni.”

9. § 36, *imm. 4* ima oqaasertaqassaaq:

”*Imm. 4.* Apeqquteqaat aallaavigalugu oqallinnermi Inatsisartunut ilaasortat partiillu inatsisartut oqaaseqaatissaannut allannguutissanik siunnersuuteqarsinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaatissaannut allannguutissatut siunnersuummut allannguutissatut siunnersuuteqartoqarsinnaangilaq. Apeqquteqaat pillugu oqallinnermi taamaalluni inatsisartut oqaaseqaataat ataasiinnaq akuersissutigineqarsinnaavoq. Inatsisartut oqaaseqaateqarnissaaannut siunnersuut ataaseq akuersissutigineqarpat, inatsisartut oqaaseqaatissaattut siunnersuutaajunnartut ataatsimiinnermik aqutsisumut nalunaarutigineqartut, sulili taasissutigineqanngitsut, atorunnaassapput. Apeqquteqaammik oqallisiginninnerup nalaani allatut ilusilimmik aalajangiisoqarsinnaangilaq, takukkilli §§-it 50-miit 52-mut.”

10. § 38-mi imm. 4-p kingornanut immikkoortutut nutaatut ilanngunneqassapput:

”Imm. 5. Naalakkersuisunut Inatsisartunullu ilaasortanit siunnersuutit Inatsisartut ukiuata naanerani inaarutaasumik akuersissutigineqarsimanngitsut atorunnaartarput, taamaattorli imm. 6 takuuk. Tamanna aamma atuuppoq Inatsisartunut ilaasortanit apeqquteqaatinut, Inatsisartut ukiuata naanerani inaarutaasumik suliarineqarsimanngitsunut.

Imm. 6. § 33, imm. 6, nr. 1 naapertorlugu Nunatta Karsiata Naatsorsuutaasa akuerineqarnissaannik siunnersuut imm. 5 apeqqutaatinnagu Inatsisartut ukiuata naanerani atorunnaarneq ajorpoq.”

11. § 40-mi imm. 1 kingornanut immikkoortutut nutaatut ilanngunneqassaaq:

”Imm. 2. Imm. 1-imi piffissaliussaq § 36 naapertorlugu apeqquteqaatit nalunaarutigineqarnerannut atuutinngilaq.”

12. § 43, imm. 3 aamma 4, ima oqaasertaqassapput:

”Imm. 3. Ataatsimiinneq aallartereeraangat ataatsimiinnermik aqutsisup pissutissaqarluni ataatsimiinnermi oqaluuserisassat tulleriinnerat allanngortissinnaavaa imaluunniit oqaluuserisassamik ullumi pineqartumi isumaqatigiinniarnerniit peersisinnaalluni.

Imm. 4. Ataatsimiinnermik aqutsisoq ataatsimiinnermi oqaluuserisassanut suliasanik nutaanik ilanngussisinnaanngilaq Inatsisartut akuersissuteqarsimatinnagit.”

13. § 48, imm. 1 ima oqaasertaqassaaq:

”§ 48. Suleriaatsimut Ilanngussami 1-imi tulleriinnilersuineq nalunaarneqartoq malillugu isumaqatigiinniarnernit ingerlanneqartassapput. Ilanngussami allatut nalunaarsimasoqartinnagu partiip Inatsisartuni amerlanerpaanik ilaasortaataqartup oqaaseqartartua siulliulluni oqaaseqassaaq, tulliulluni oqaaseqassalluni partii amerlanerpaat tulliunik ilaasortaataqartoq il.il., partiit tamarmik oqaaseqartuisa oqaaseqarnissaasa tungaanut. Partiit marluk amerlaqatigiinnik ilaasortaataqartillugit Inatsisartunut qinersinermi kingullermi partiip amerlanernik qinerneqartup oqaaseqartartua siulliulluni oqaaseqassaaq.”

14. § 48, imm. 3-mi ”ilanngussami” allanngortinneqassaaq ”Ilanngussami 1-imi”-nngortillugu.

15. § 55-ip kingornanut qulequttatut nutaatut ilanngunneqassaaq:

”*Nammineq atuuffiit inuussutissarsiutillu pillugit paasisutissat*”

16. Qulequttap nutaap kingornanut ilanngunneqassaaq:

”§ 56. Qanoq annertutigisumik qanorlu ilusilimmik Inatsisartunut ilaasortat namminneq atuuffitik inuussutissarsiutillu pillugit Inatsisartut atuuffinnik nalunaarsuiviannut paasisutissiisarnissaannut malittarisassanik Suleriaatsimut Ataatsimiititaliaq aalajangersaassaaq.

Imm. 2. Inatsisartunut ilaasortat qinigaasinnaanermik akuerineqarnerata kingorna qaammat ataaseq qaangiutsinnagu Inatsisartut atuuffinnik nalunaarsuiviannut paasisutissanik tunniussissapput. Paasisutissanik tunniussinermi immikkut immersuivissaq ilaasortat

atussavaat.

Imm. 3. Sinnisussat piffissamut aalajangersimangitsumut Inatsisartunut ilaasortaq taarserlugu ilaasortanngortut Inatsisartunut ilaasortanngornermik kingorna ullut 30-it iluanni paasissutissanik tunniussissapput. Pisussaaffik tamanna aamma atuuppoq sinnisussanut piffissamut sivikinnerpaamik ullunut 30-inut Inatsisartunut ilaasortaq taarserlugu ilaasortanngorallartunut.

Imm. 4. Inatsisartut atuuffinnik nalunaarsuiviat Inatsisartut nittartagaanni tamanit takuneqarsinnaassaaq.”

Maannamut § 56-iusimasoq atorunnaarpoq.

17. Kapitali 13 ima oqaasertaqassaaq:

”Kapitali 13

Tunuarneq, sulinnigiffeqarneq il.il.

§ 57. Naalakkersuisunut ilaasortaq Naalakkersuisunit tunuarniuteqarpat Inatsisartut aalajangissavaat qinnuteqaat akuerineqarsinnaanersoq.

Imm. 2. Naalakkersuisunut ilaasortaq peqqiilliornini allamilluunniit pingaarutilimmik pissuteqartumik sulinnigiffeqarnissamik qinnuteqarpat Naalakkersuisut Siulittaasuata aalajangissavaa qinnuteqaat akuerineqarsinnaanersoq.

Imm. 3. Naalakkersuisunut ilaasortaq sulinnigiffeqarallarnissaminik akuerineqarpat imaluunniit Inatsisartut ataatsimiinneranni peqataasinnaanngikkallarpat Naalakkersuisut Siulittaasuata Inatsisartut Siulittaasuannut nalunaarutigissavaa taassuma suliassaarfii kimit isumagineqarallasanersut.

§ 58. Inatsisartunit sulinnigiffeqarneq peqataasinnaanngikkallarnerlu kiisalu sinnisussamik ataatsimiigiaqqusisarneq pillugit Inatsisartut malittarisassaasut suleriaatsimut matumunnga Ilanngussami 2-mi aalajangersarneqarput.

Imm. 2. Inatsisartunut ilaasortaq Inatsisartunit tunuarumalluni qinnuteqaateqarpat Inatsisartut aalajangissavaat qinnuteqaat akuerineqassanersoq. Inatsisartunut qinersinermi qinersinermik allattaavimmi sinnisussat allattorsimaffianni ilanngunneqarsimalluni sinnisussaq qinikkatut sulinniginnissaminik qinnuteqarpat qinnuteqaat akuerineqarsinnaanersoq Inatsisartut aalajangissavaat. Qinnuteqaat Inatsisartut ataatsimiinnerata avataatigut saqqummiunneqarpat Inatsisartut sinnerlugit Inatsisartut Siulittaasoqarfiata aalajangissavaa qinnuteqaat akuerineqarsinnaanersoq.”

18. *Inatsisartut suleriaasiannut Ilanngussaq 1,* maannamut *Oqaaseqarnermi piffissaliussat pillugit ilanngussaq-*mut taartaasoq, allannguutissatut siunnersuummut matumunnga Ilanngussatut 1-itut oqaasertalerneqassaaq.

19. *Inatsisartut suleriaasiannut Ilanngussaq 2,* allannguutissatut siunnersuummut matumunnga Ilanngussatut 2-tut oqaasertalerneqassaaq.

§ 2

Allannguutit ulloq 1. januar 2015 atuutilissapput.

Inatsisartut, ulloq uu. qqqq 2014

Lars-Emil Johansen
Inatsisartut Siulittaasuat